

L'ESSOR FASO KUMAKAN

Marisi jamanaw, 1984

"UDPM" nyèmògòso jèkuluba ka laadala tònsigi

Taratadon Feburuye kalo tile 28, san 1984 "UDPM" nyèmògò jèkulub y'a ka baaraw daminè faso tògòla soba la, Pariti "UDPM" Sekeretèri Zenerali ni jamana kuntigi Zenerali Musa TARAWELE ka nyèmògòya kònò.

Kènè in datigèra Pariti nyèfè tòn ni Gòfèrèna ma mògòw nyè na ka fara jamana wèrèw lasigidèn kan, minnu bë Bamakò.

Lajèba in ye tile saba ta, minnu kònò, tònsiglaw y'u sinsi Pariti "UDPM" jòrènankobaw kan.

Kunkòròta sèbèn dira Mali sòròdasiw ma ani Kòlónjèba ni Bankasi ani Kajolo ni Sikasò ni Nyafunkè. Sannifeere ta dira Nyònò ma ani Kucala ni Bankasi.


Bagaw ladonni konyuman kunkòròta sèbèn dira Menaka ni Yelimane ni Dire ma.

Nganiya jira min kèra baarakèlaw fè faso dèmèni sira kan jamana bée kònò, o waari kasabi taar'a jò Mali wari 1.214.303.756 la.

Laadala tònsigi in datugu don, Alamisa wula, Marisi kalo tile fòlò, an ka jamana kuntigi ye kuma ta k'a jira ko jamana den kelen-kelen bée ka kan k'a seko damajira k'e Mali sòrò n'a hadamadenya walew yiriwali la, walasa an ka se k'an niyòrònin fara an bénbaw ka kelenw kan, olu minnu ma siran gèlèya nyè don kelen da kelen.

Zenerali Musa TARAWELE y'a jira ko fèn nafama-baw bòra lajèba in baaraw kònò, minnu ye Pariti kunkòròta kosébè, bawo u ye damakènyè ni bèn ni kelenya ni faso kanu nyi ni tòndenw bée fè, ka dusu kura don militanw bée kònò, walasa bée ka se k'a jeniyòrò fin faso baaraw-la, k'an ka bòndò-gòla teliya, k'an ka nyè-taa sabati, ja n'a masiba minnu bë k'an tòorò, an ka se k'o gèlèyaw latèmè ni fèerè nyènamaw ye.

Nka, a ko ni fòlen nin-nu si tè taa jèkafò ni jèkakè kò jamanadenw n'u ka mògò sugandilenw ni



nyògòn cè, ani fangaso ni Pariti ni nyògòn cè. A tè bén fo jamanadenw bée sen ka don u ka hèrè nyi nini baaraw jateminèli la, u fana k'u fèlaw jira jamana haminankobaw kan.

Yiriwali tè nyè fèerè kuraw sòròli kò, minnu wajibiyalen don an jigi fali la ja n'a masibaw

kèlèli la ani an yèrèlabòli sumanko la, ani jamana nafolokow bilali sira tilennen kan. Min ya baarako ye, an ka jama na kuntigi ko, fo k'o kè diinèko de ye an bolo, an ka nyògòn sòn hakili la o sira kan, ka nyògòn ladamu, ka jogo nyuman don nyògòn na, ka nyògòn kun-

nafoni kètaw ni kelenw kan. O dòròn de bë se k'an danbe segin an ma, k'an hòrònya sira bée kan.

"UDPM" Sekeretèri Zenerali y'a kanbò malidenw bée ma, minnu bë jamana kòkan, u ka fara nyògòn kan jèkuluw kònò, cogo min, u bë se k'u ka di-

nyèlatigè latèmè konyuman wali jamanaw kan. O n'a ta bée, u k'u hakili to faso fana la, bawo a bë fò an bara ko "ni su m'a nyèko dòn, a bòra ka min to a kò, a b'o kòni dòn".

An ka bolodinyògònma ni jèkabaara tè bi ko ye, bawo kabini lawale la, n'i tun ye mògò kelen kòngòtò ye an ka dugu fèn o fèn kònò yan, i b'a sòrò kòngò tun b'o dugu bée la. O hakili nyuman n'o jogo nyuman kelenw de ka kan k'an dèmè, an ka gèlèyaw kurutigèli la, gèlèya minnu bë dinyè fan bée ni ja kelen don ka caman fara anw taw kan bi.

An ka Pariti nyèmògò fòlò ko, fèerè minnu sirla lajè in kènè kan olu ka kan ka waleya te-liya la; nyèmògòw ka don jamana fan bée, ka taa kètaw pereperelatigè tòn denw bée ye, bawo mògò si tè se ka kè fen ye, i yèrè kò; jamana fana tè se ka jò jamanadenw kò.

An ka jamana kuntigi ka kuma laban na, a ye Mali jamana nganiya jira siginyògòn jamanaw bée fan fè; k'a jira k'an labènnen don sanga ni waati bée jamana hòròyalenw ka tònba "ONU" ka nyinintaw waleyalil la, hèrè ni bèn ni lafiya donnai la jamanaw ni nyògòn cè. An tugulen tè jamana si la. An sago ye fonyògòn kò dugali ye jamanaw bée kònò, walasa u denw ka hèrè sòrò, i n'a fò Cadi ni Sahara tilebinyanfan. Afiriki jama na hòròyalenw ka tònba "OUA", o ka kelenya sinsini y'a haminankoba dò ye bi.

A ko "UDPM" labènnen don ka bolo don dinyè Pariti Politiki tòw bée bolo ani dinyè jamanaw bée lajèlen an bonya bë minnu yòrò, n'u b'an gasi sigi. An, bë Namibi ni Afiriki woroduguyanfan ni Palèsini fasokumabò-law kòkòrò u ka hòrònya kèle la.



Peresidan Musa TARAWELE ka nyògònye


Mali foroba Pariti "UD, PM" Sekeretèri Zenerali n'an ka jamana kuntigi Zenerali Musa TARAWELE ye Otiwalita kunnafonidiso minisiri Adama TURE bisimila Taratadon, Februaraye kalo tile 28, san 1984. Adama TURE cira kèrenkènena la, k'a ka jamana kuntigi Tomasi SANKARA ka sèbèn nafama dò lase a balimakè Zenerali Musa TARAWELE ma.

Nyògònye in fanba tun bë Mali ni Otiwalita cèsiraw de kan ani dò fara li jamana fila ka teriya ni badenya kan, min b'u denw ni nyògòn cè, kabini bi tè.

Nyògònye kènè in kan, mògò minnu tun bë Otiwalita minisiri kérèfè, o y'u ka kungokònàna yirivali ciyakèda kuntigi Mishèli TAPISOBA ye ani Otiwalita ni jamana wèrèw ka jèkabaara sèriwusa nyémögò Poli KABORE ani u ka jamana kòkankow minisiri dèmèbaga dò, n'o ye Marisèli ye.

Kènè in kan, mògò minnu tun bë Zenerali Musa TARAWELE kérèfè, o ye Mali ni jamana wèrèw cèsiraw minisiri Aliyuni Bi-londèn BEYI ani an ka jamana kunnafonidiso ni nègèjuruso konyèw minisiri, Madamu Gaku Fatu NYANGI, ka fara Mohamèdi Aluseyini TURE kan, n'o ye Mali fangaso Sekeretèri Zenerali ye ani an ka jamana kuntigi dèmèbaga dò lasigidenso konyèw la, n'o ye Tijani GISE ye.

Kèrènkènena la, an ka jamana kuntigi y'a wasa don Otiwalita jamana kuntigi ka ciden na, a k'a lase Tomasi SANKARA ma, ko Mali n'a nyémögò labènnèn don sanga ni waati bée an ka jamana fila cèsiraw lawèrèli la ani jèkabaara ni bolodinyògònma walew bée la, an ka jamanadenw ka hèrè siratigè la. A y'a nyini a fè a ka malidenw bée ka foli lase Otiwalitadenw ma.



ZENERALI MUSA TARAWELE NI MINISIRI ADAMA TURE, OTIWALITA JAMANA KUNTIGI

TOMASI SANKARA KA CIDEN MALI LA.

Canze BOLEZOGOLA ye Mali sèbènnikèlaw ka jèkulu UEM bisimila

Arabadon, Feburuye kalo tile 15, san 1984, Mali sèbènnikèlaw, i n'a fò hakililasèbènnikèlaw ni poiyikèlaw ni lawalekow sèbènnikèlaw, n'u nyògòn-naw, olu ka tònba "UEM" y'a ka lajè kè an ka dònko ni seko lakòlisoba la Bamakò.

Tònsigilaw da sera fèn fila de ma, n'o ye tònnyémögò kòròw ka salon kèlenw jateminèli ye ani nyémögòso kura sigili sen kan.

A jirala ko kow ma nògoya nyémögòso kòròw mògòw bolo, nka o n'a ta o ta u sera ka tònnyènemaya, k'a kè fèn yamaruyalen ye jamana fangaso bolo.

O tèmènen ko, tònsigilaw da sera fèrèw ma, minnu bëna se ka kè sababu ye ka dò fara konyu man kelen kòròw kan, ka dusu kura don tòndenw

kònò, k'u ka gafew dilancogow fèsèfèsè, k'u ka baara ladònniya ani ka lafasabagaw sòrò u ka tònna Mali kònò an'a kòkan.

Nyémögòso kura min sìgira sen kan, o mògòw filè :


- Sekeretèri zenerali : Isimayila Sanba TARAWELE
- Sèbènkow nyènabòbaga : Pasikali Baba KULUBALI ;
- Kòkankow ni sèbènnikèlaw ka sariyaw nyènabòbaga : Yusufu SOGOBA ;
- Kolabènbaga fòlò : Behima MARIKO ;
- Kolabènbaga filanan : Umaru KANUTE ;
- Kunnafonikow nyènabòbaga Amadou GANYI Kante ;
- Warimarala fòlò : Sha-ka JARASUBA ;
- Kow sègèsègèlikèla : Abudulayi CAMU ;
- Hadamadenya walew nyènabòbaga : Gawusu JAWARA ;

"UEM" nyémögòso kura mògòw bisimilala Tara-

tadon, Feburuye kalo tile 21, san 1984, faso tògòla soba la, Canze BOLEZOGOLA fè, n'o ye Pariti "UDPM" nyèfè tòn kunnafonikow ni seko ni dònko nyènabòbaga ye.

Isimayila TARAWELE "UEM" nyémögò kura o ye dòonin fò u ka tònka dinyè labò kan, o kò ka Pariti ni Gòfèrènama ka dèmè nyini jamanadenw bée haninankow waleyali la, n'o y'an ka nyètaa ni bònogòla ye joona, sèbènnikèlaw jòyòròba bë minnu na, bawo olu de bë se ka Pariti ni Gòfèrènama mii rinataw jènsèn jamana kònò an'a kòkan.

Canze BOLEZOGOLA ko a ka jaabi kònò, k'a n'a seko bée kè "UEM" dèmèli la, bawo a n'u ka ci lase nyènabòbagaw ma. A k'a bë min nyini u fè, o ye u jòyòrò fali ye jamana ka politiki sira sinsini la, walasa an jigi ka fa an haminanko gèlènw wale yali sira kan.



Musow ka kalanso dò dayèlèla welesebugu

Ntènèndon sogoma, Zanwuye kalo tile 30, Madamu Mariyamu TARAWELE n'a le de ye an ka jamana kuntigi Zenerali Musa TARAWELE furumuso ye, a taara Welesebugu, musow ka kalanso dò dayèlèla hukumu kònò.

Nin donba in na, an ka jamana kuntigi furumuso taamanyògòn tun ye Madamu SO Worokiyatu so ye, n'o ye Mali musow ka kelenya tònba "UNFM" nyémögò fòlò ye, ani Pariti "UDPM" nyèfè tòn ni depi teso nyémögò dò, ka fara jamana wèrè lasigidenw kan, minnu bë Mali la.

Lamerikèn minnu y'an dèmè kosèbè kalanso in jòli la, olu ka lasigidenso kow nyènabòbaga tun bë kònè kan. Teri jamanaw ka cidenw ni Mali mara kelen-kelen bée taw, minnu tum nana Mali musow ka lajèba sabanan baaraw la, olu bée tun bë yen.

Welesebugu musow ka kalanso in jòli fèrèw jutigèra kabini san 1975 lamerikèn farafin musow ka jèkulu fila fè. A na-folo kasabi dantigèra ka se lamerikèn wari dolari 500.000 ma, Ameriki ka dèmèkè jèkulu dò fè, n'o ye "USAID" ye.

Kalanso in jòkun ye ka Mali kungokònò musow ka hadamadenya ni sòrò walew yiriwa ka t'a fè, k'u ka dinyèlatigè nògòya u bolo ni dònnyia kuraw

ye, minnu kòdonnen tè u ka laadaw ma.

Kalanso in jòli diyara kosèbè Welesebugu n'a lamini bée ye. Dèmè bòra yòrò caman ka lase u ma, k'a daminè Bèliziki jama na mògòw la ka se diinè mògòw ma ani fangasow ni Politiki nyémögòw.

Musow yèrèw y'a nyini u ka kalan siraw ka bòdenmisènw balocogo ani kènèya sabatili walew ni tinminèmusokòròbaw labèn ni.

U ka kalansen bée bëna k'u kun bamanankan na, ka jaw ni filimuw ni fèn wèrè kë k'o dafa.

Kalanw mana ban faramsi buwati ni wotorow ni fèn wèrè bë di kalan denw ma, walasa o ka se ka dugu mògòw nafa; u bë dèmè fana u ka baaraw waleyali siratigè la.

Kalanso in animatirisi caman sera k'u jeniyòrò fin k'a ban bësèya walew la ani uruyidilan ni ni-wakini kisèw dili ni laa dilikan nyumanw laseli musokònòmaw ma.

Nka u ka baara in gèleyaba dò ye u magonyè ji sòròbaliya ye, u y'a kanu kòlònw ka sen u bara ani nyémögòw k'a lajè kalanso in ka se ka sira sòrò jamana yòrò caman.